



JL 6
2529
17



門ル86
號2529
卷49-17



吉林通志卷四十一

經制志六

礦廠

會城東南木齊河

咸豐四年奏請開採其奏請封禁年月舊案無存

會城東歲沙河

流民私開同治七年奏請封禁

三姓城東南樺樹林子

夾皮溝

太平溝

蜂蜜山

以上四處光緒四年奏請試辦其奏請封禁年月舊案無存

三姓城東南太平溝

樺皮溝

南淺毛溝

以上三處光緒十六年奏請試辦八月十七日奏請封禁以上金礦

咸豐四年閏七月初九日將軍景淳奏竊咸豐三年戶部咨令各直省遇有金銀礦場卽行開採納課等因_臣履任以來適有商民劉芳圃等以登潭卡倫所屬之木齊河一帶產有金砂呈請採辦_臣遂派員勘得木齊河在封禁山場之外與風水地脈無礙臨江一帶露有金苗似堪開採_臣隨給商民劉芳圃等執照仍令原派之員督同採辦旋據稟稱目下招人試採逐日所得金砂僅敷人夫工食無甚贏餘訊據劉芳圃等聲言現採之地其苗不旺是以未能多得若

採至旺處必可交官納課等語_臣剴飭該委員等認真試看如往後金苗果旺可以於公私有益卽定章程奏請開採納課儻仍止敷衍日用卽行停止封閉奉

硃批知道了欽此

同治七年二月二十五日將軍富明阿奏爲酌擬葳沙河等處金場明定派員分季輪查章程永奠邊疆而肅山場事竊照葳沙河等處金場屢經

奏奉

諭旨派員安插遣散金夫不致流而爲匪當經派協領那斯

洪阿富爾丹帶兵前往安插遣散查辦完竣復經前署任副都統富爾孫親往覆查委無偷挖情弊所有金夫除遣散驅逐外其餘概歸樺皮甸子等處務農安業伏查葳沙河金場南與輝發河毘連而輝發一帶向爲奉天盜賊之藪儻查察稍鬆難免奸民濫入復起偷挖肇衅之漸是以上年冬月間遴派原辦花翎協領富爾丹等帶兵百名前往葳沙河一帶巡查尙無潛入偷挖人犯獲得馬匪四名焚燒偷搭窩棚數處現乘春初河冰未化之先仍派該協領富爾丹等帶兵往復周歷嚴查旋據稟報葳沙河一帶老金

場委無奸民濫入偷挖等語前來臣等覆覈雖屬無

異然慮老金場一帶地方遼闊山路旣多崎嶇林麓更屬稠密加以崇巖陡澗夏秋之際人馬不能深入難免不無偷挖情事查此偷山人犯口糧必須冬令乘江水凝結挽運若嚴定稽查章程阻其偷越諒不待驅而自息矣臣等擬定每年以春冬爲率卽派原辦安插金場之協領那斯洪阿花翎協領富爾丹二員輪流帶兵巡查一次有匪必獲有棚必焚並嚴禁米麪以杜偷運之弊以專責成而奠疆域統俟一二年後山場經久肅清再行奏明停往再甯古塔副都

統烏勒興阿今正因公進省臣面詢甯古塔屬驅逐各金場事宜據該副都統聲稱現已派員帶兵將一概金夫驅逐淨盡不致復聚等語臣卽擬責令該副都統仿照省會明定巡查金場章程分春夏兩季遴派妥員帶兵實力摻查禁止販運米麪以歸畫一而肅山場奉

旨葺沙河一帶金場仍著該將軍等飭令派出各員嚴密摻查毋任奸民濫入偷挖欽此

光緒十六年三月二十九日將軍長順奏爲查明三姓地方產金擬請派員試行開採以濬利源事竊維五金礦產爲天地自然之利果能採取如法經理得宜裕國足民悉基於此吉林金礦如省南木其河夾皮溝及甯古塔所屬之萬鹿溝等處從前聚集數千人偷挖自封禁後往往潛赴三姓山內搭蓋窩棚採取木耳名爲菜營實則乘間盜挖金砂拏獲盡法懲辦並派隊遂散棚民而顛愚無知趨利如鶩驅去復來羣傳吉林通省以三姓礦苗最佳如樺皮楸皮各溝及南淺毛楊木岡並黑背等處均有金匪私挖舊跡且其處地脈堅凝山嶺重疊砂色渥丹引苗時見洩露查光緒十四年十一月間翰林院侍講崔國因

條奏東三省情形其論金礦一條謂與其使鄰國垂涎而起侵佔之釁曷若由本國開採以裕兵餉之源洵屬切中時弊當時會奉

諭旨會同定安酌覈妥議臣以到任未久地利興廢絕無把握未敢率爾覆陳今則搏採輿論勘驗形跡按以邊地時勢而知開礦之舉實難置爲緩圖所慮款項支絀工本無資再四籌思惟有先行試辦一法從來談礦務者每於官辦商辦民辦迄無定論前經部議有商理其事官總其成兩言至當不易而試辦之法尙未足以語此祇能化私爲官而已金夫首領俗謂

把頭每一把頭作一股每股俗謂一枝幫其下有幾盤溜一溜不過用二三十人今擬按溝派把頭一名管領幾枝每枝再派幫管領一二十人分作一二十溜其人卽就近挑諸菜營免致驅逐後流而爲匪按照人數編冊稽查所有器具食糧油柴均由各把頭自行備辦無待官爲籌款卽委員司事人役薪工亦俟出金抽釐積有成數再行定章開支現已派員前往查勘情形一面咨會三姓副都統就近督同勘辦十六年六月二十一日將軍長順奏爲續報委員勘明三姓金礦地方並暫時試挖得金緣由竊照三姓

地方前經臣訪聞該處山內貧民搭蓋窩棚採取木
耳名爲菜營實則乘間並挖金沙驅去復來一時難
以斷絕當於本年三月三十日奏請化私爲官以濬
利源奉

旨該衙門議奏欽此欽遵在案當臣出奏後旋接委員等
稟稱金溝在三姓東南一隅距城約三百里溝名有
南淺毛老淺毛樺皮太平之分周圍幾及二百里地
勢如上字形南淺毛溝長十五六里已掘有二十餘
條水道老淺毛溝在南淺毛之北長約十里與長五
六里之樺皮溝相接均有五六條水道此三溝之東

越老爺嶺下爲太平溝南北長百餘里計水道五六
十條各水道或深二三尺及七八尺不等樺皮一溝
兼大方坎各溝被挖之處蜜如蜂房幾無隙地蓋金
匪之忽聚忽散恣行偷挖者已數十年於茲矣金色
以南淺毛樺皮兩溝爲最產金之處多在山陰凡山
之陽雖見金綫亦甚稀少惟山深林密頭頭是道金
匪最易藏蹤官至則散而爲樵官去則聚而偷探查
各溝附近菜營窩棚及無業流民約計不下千餘人
逐之必至流而爲匪不逐又無以使其不挖計惟有
化私爲官之法子限數月暫行試採數月以後則此

項流民是否可用地利能否久興均有把握所定章程亦可因利制宜不致徒勞而鮮獲並聲明楸皮一溝及黑背等處應俟勘明統行詳細繪圖貼說呈送等情_臣查所稟係屬實在情形不得不稍事變通且事已奏明勘辦當經批准予限兩箇月暫行試採嗣復據委員等稟稱各溝產金衰旺不一旺者綫脈幾厚至三尺寬二三尺不等衰者亦厚尺餘然金夫有初挖而卽得金者有淘沙至十餘日而一無所獲者蓋金綫甚細私挖之弊由來已久以致體認難眞現在試採未有定章凡金夫之器具衣食悉令自備無論得金多寡俱按一成從寬抽取三成歸公該金夫亦覺馴良可用從前各溝共有千餘今已陸續遣散祇剩三四百人一俟散盡再將所抽課金並支銷經費數目勾稽具報並先附解金砂壹百兩呈驗等情前來_臣查吉林爲我

朝根本重地三姓又與俄疆毘連開礦之舉誠宜其難其慎前奏試辦之請意在漸事擴充不欲先行鋪張致貽一發難收之悔今閱該委員等前後所稟之詞爲之詳加體察覺地利可興而人數不可不限此卽因地制宜之辦法也_臣智識短淺於礦務又毫無閱

歷未敢固執已見且該處准否開礦尙未奉准議覆未便遽定章程惟迭據該委員等稟請變通辦理均係前次出奏以後之事相應請

旨飭下一併覈議速覆俾得詳細擬定章程奏請

聖裁奉

硃批該部知道欽此

再三姓礦務前經_臣長順將委員勘明礦苗及予限暫時試採情形詳細奏明奉

廷寄著李鴻章會同長順遴選幹練之員前往三姓切實履勘議章覆奏等因欽此當經電准李鴻章飭令督辦

漠河礦務候補道李金鏞派員往勘在案茲據試採三姓金礦委員稟稱試採金礦限期屆滿所有金夫散遣已盡有業者使其歸業無業者飭令回籍不准逗遛並嚴行封禁俾免進溝偷挖等情並據將所抽課金自行解交前來_臣查此次採礦兩月有餘共抽金六百四十四兩八錢二分五釐除呈海軍衙門五十兩北洋大臣十兩考驗並開支經費銀一千七百六十七兩二錢六分六釐覈計用金一百二十九兩八錢二分四釐外實存金四百五十五兩零一釐以備將來開採經費除咨部查覈外謹附片具陳再此

項開採經費委係實用實銷應請免其造報奉

硃批該衙門知道欽此

以上俱
官冊

琿春城西北天寶山

光緒十七年奏請
試辦銀礦今存

光緒十七年三月初九日將軍長順奏為勘明琿春
天寶山銀礦現已派員試辦將大概情形據實密陳
事竊臣恭承

恩命辦理邊務深慮常年兵餉日久難繼每就地擘畫濬
開利源庶外省多籌一分之餉卽部庫少紓一分之
力自抵任後周諮博訪羣以三姓產金琿春產銀為
美譚三姓金礦前已將化私為官暫時試辦情形詳

細奏明在案惟琿春產銀之說一時無從考證經恩
澤遴派候選縣丞程光第細加躡勘當於南岡天寶
山見有銀礦已挖成硎似係昔日流民私開因其無
利而棄者取驗砂質不甚精美復於附近地方覓得
礦苗鑿驗砂質較之舊硎為優上年春間恩澤赴南
岡校閱右路一軍折至該處覆加履勘覈與程光第
所勘情形相符與臣往返函商隨令程光第招集商
本試行開採去後茲據稟稱勘得天寶山在吉林省
城東南七百餘里西接哈爾巴嶺蜿蜒二百六十里
為此山之發脈南襟古城大川北帶博爾哈通河峰

巒秀異巖壑深藏出脈聚氣與他山迥殊自奉派後擬卽招集商股銀一萬兩未能如數先行奏足五千兩前往該處建造房屋購運糧食置備器械僱募人夫盡力開採從前流民所開舊硎係在北山穿至七尺卽因石堅停鑿至另採銀苗二枝係在南山其一枝入山綫鑿至丈餘未見槽砂其一枝立山綫計鑿八硎惟第三硎始得正脈其餘各硎雖見苗砂尙無正綫未敢深求致滋虛費現在第三硎鑿至十五丈砂綫時寬時窄寬則三尺餘窄則尺餘足供四十餘人採取月可出砂十五六萬斤初鑿之砂每千斤煉

銀質二十餘斤提銀十二兩有奇迨鑿深十九丈每千斤煉銀質七十餘斤提銀三十一二兩以目下月出砂數覈計提銀約可出銀四千五六百兩現在存砂七十餘萬斤擬趁此春融廣備灰炭先設燒生砂大鑪八十座每座燒生砂三千斤用木炭燒煨三次每月出熟砂二十四萬斤又加煉銀質大鑪四十八座每天輪流煉熟砂八千斤可出銀質五六百斤提銀三百餘兩覈計一箇月可出銀一萬兩近時礦丁鑪匠及雜丁夫已用一百七十一名若再設鑪煉砂尙須添用一百數十名共三百餘名月需工食銀一

千七八百兩月需油鐵等項五六百兩連局用薪水
每月共需經費銀二千數百兩如每月煉提銀一萬
兩尙可贏餘七千餘兩第煉提賴乎人工本屬可遲
可速而鑿取限乎地利不能予取予求且夏秋陰雨
時候地氣鬱蒸硎丁在硎未能久作勢所必至祇期
此後各硎一律開及正脈足供多人採取苗綫日增
提銀自鉅應如何酌提歸公以裕餉源覈計獎敘以
資激勵之處續俟擬定章程呈請覈辦等情並將銀
兩銀質生熟各砂呈驗前來臣查程光第勘辦銀礦
既經覓有苗綫二枝開硎九處據稱雖只一硎開及

正脈而每月出砂可提銀四千五六百兩加鑪燒煉
月可出銀萬兩是剏辦之始無虞虧賠將來各硎皆
得正脈苗綫日漸增多則其利之充盈尤可想見裕
餉固邊計誠莫善於此第煉砂提銀僅恃土法恐銀
質未淨多所委棄現已派員馳赴天津購辦洋鑪並
恐程光第一人難以周顧添派候選縣丞祿崧前往
會同辦理一面仍飭該員等作速妥擬詳細章程再
行酌覈奏請

聖裁除將送到寶銀一錠銀質一塊生熟各砂數包咨呈
海軍衙門考覈外所有派員試採琿春天寶山銀礦

緣由理合恭摺密陳奉

硃批該衙門議奏欽此

官册

會城西南營盤溝

嘉慶二十年奏請開採二十一年奏請封閉

會城正西波泥河

會城西北胡家屯

會城東北缸窰

丁家溝

以上四處嘉慶二十年奏請開採二十三年奏請封閉

田家屯

嘉慶二十年奏請開採其奏請封閉年月舊案無存

江東三道溝

道光元年奏請開採其奏請封閉年月舊案無存

江西柳樹河子

光緒六年奏請開採其奏請封閉年月舊案無存

陶家屯

光緒七年奏請開採九年奏請封閉

荒山子

長嶺子

以上二處光緒九年奏請開採十六年奏請封閉

江東荒山子

江西下二台

西南山坡

以上三處道光元年奏請開採現存

江東鍋盔頂子

江西大葦子溝

石碑嶺

泥球溝子

以上四處光緒六年奏請開採現存

吉林通志卷四十一

江東大石頭頂子

亂泥溝子

半拉窩集溝

二道河子

以上四處光緒七年奏請開採現存

江東後二道河子

光緒七年因前審水大無煤咨部封閉奉准部覆移挪於此開採現

存惟前審係何年奏請何處何名原案無存 以上煤礦俱官冊

道光元年正月初六日將軍富俊奏為吉省煤審仍

請開採以裕旗民生計事竊查吉林旗民向係砍木

炊爨嗣因生齒費繁山木愈砍愈遠挽運維艱柴價

昂貴旗民生計拮据臣前任吉林將軍時援照奉天

開採煤審之例於嘉慶二十年奏准開採缸窰田家

屯營盤溝波泥河胡家屯丁家溝煤窰六處每處納

稅銀十七兩零籤掣旗人承領票張試採去後旋因

吉林營盤溝創無煤斤依線尋至營盤溝之西南山坡得

有煤硯臣派員查無關礙咨部給換票張隨於嘉慶

二十一年閏六月間接准部咨內開奉

上諭工部奏駁吉林於營盤溝相連山坡開採煤窰一摺所

駁是吉林前經奏准開採煤窰六處其缸窰等五處產煤

豐旺已足供旗民日用之需至營盤溝一處試採無煤應

照例題請封閉乃於相連之西南山坡換給執照易啟影

射朦混之弊著卽封閉執照繳銷以符定制其缸窰等五處稅銀著於開創之年起納欽此欽遵咨行前來臣因營盤溝一帶村屯甚多附近二百餘里山木砍盡距缸窰等處道路遙遠挽運艱難冒昧瀆請仍於營盤溝之西南山坡開採於嘉慶二十一年間奉

上諭富俊等奏營盤溝西南山坡煤窰仍請照舊開採一摺吉林產煤處所已准開採缺窰等五處其營盤溝一處試採無煤復於相連之西南山坡開採經部議駁降旨令其封閉該將軍等又復陳請開採吉林少此一處煤窰於旗民生計有何妨礙所奏不准行富俊向於公事好固執已

見著傳旨申飭所有西南山坡煤窰仍著封閉不准奸徒私採該將軍毋得再行瀆奏欽此欽遵飭將營盤溝相連西南山坡之煤窰封閉在案賴有缸窰等五處採煤豐旺足資生計臣調任

盛京後缸窰波泥河胡家屯丁家溝四處煤窰均各坍塌出水於嘉慶二十三年經前任將軍松霖具題封閉亦在案僅有田家屯一處照舊開採是年冬臣復調任吉林到任後據承領票張各旗人呈稱缸窰附近之荒山子胡家屯附近之三道溝田家屯附近之下二台等三處均有煤線情願開採納稅等因臣派

員查勘屬實均無關礙開明四至界址於嘉慶二十四年咨請部示續經工部咨覆不准開採當卽示諭封閉在案伏查從前營盤溝一處封閉原無妨礙今復封閉四處僅有田家屯一處不能運遠柴薪日益增價旗民生計未免拮据查

盛京自乾隆四十年開採煤窰行之已數十年旗民樂利吉林未能一體仰沐

天恩未免向隅臣深荷

聖恩俾以地方職司教養事關旗民生計不敢避冒瀆之罪所有該商等呈請開採荒山子等三處暨西南山坡

一處可否准其開採之處謹據實奏聞請

旨如蒙

俞允臣照例將各窰四至清冊咨報查覈仍於開創之年起納煤稅爲此恭摺具奏伏乞

皇上聖鑒訓示遵行道光元年正月初八日奉

上諭富俊奏請吉林開採煤窰一摺富俊從前兩次奏請於營盤溝西南山坡開採煤窰彼時吉林地方已有缸窰等五處煤窰足供採用是以奉

旨斥駁茲據奏缸窰等處煤窰近已坍塌四處僅餘田家屯一處所採煤斤不能及遠旗民日用所需未免缺乏自係

實在情形著照所請荒山子三道溝下二台及西南山坡四處俱准其開採其煤稅於開採之年照例起納該將軍仍嚴密稽查所有承領票張試採之人務各約束安靜如有奸徒藉端生事惟該將軍是問欽此

光緒六年五月十九日將軍銘安奏爲吉林人戶日繁柴薪難繼擬請試開煤窰酌抽釐稅以裕

國課而利民生事竊照吉省旗民各戶向係伐木炊爨溯自嘉慶二十一年經將軍富俊奏准開採荒山子等處煤窰三座收納稅課歷辦有年嗣於同治七年將軍富明阿續請試開火石嶺子等處煤窰七座當

奉戶部議覆以吉林地方伏莽未靖增設煤窰開採之始必多集丁夫其中良莠不齊難以稽查且圍場禁山地脈相通恐於風水有礙奏請一並封閉臣竊

以爲政在養民不外就地興利事關籌餉尤貴因時制宜近來吉省生齒日繁人煙稠密山木愈伐愈遠挽運維艱價值日昂居民日用所需多受柴薪之累若不開採煤斤以資民用則數十年後柴薪愈見稀少炊爨倍覺艱難本省煤窰只有三座所產無多不足供通省之用臣前奉

廷諭經費一層該省如有籌辦之處亦應實力籌辦等因